

Dumonda Casanova (Glion) concernent l'avegnir da la gasetta dal di rumantscha La Quotidiana

Il 20 da mars 2017, mo 3 dis suenter la festa da giubileum da 20 onns da La Quotidiana e da l'Agentura da novitads rumantscha (ANR), ha la Somedia SA inoltrà a la ANR ina dumonda per in sustegn finanziel per cuntinuar cun La Quotidiana. Il medem mument ha la Somedia mussà cleramain ch'ella vegnia a purtar ils deficits da La Quotidiana mo pli fin la fin da l'onn 2017. Sch'i na vegn betg chattada ina finanziaziun supplementara fin la fin da l'onn 2017, vegn smessa cun gronda probabilitad la producziun da La Quotidiana.

Concretamain sa tracti da surpigliar ils custs betg cuvrids da persunal e d'onuraris da 300 000 francs per onn. La Lia rumantscha e la ANR na pon betg procurar per quests meds finanzials ed igl è bain incontestà che la finanziaziun daventa pussaivla mo cun contribuziuns federalas e chantunalas supplementaras. La Somedia procurass alura vinavant en il rom da fin ussa per l'ediziun, per il marketing, per la producziun, per la stampa e per la distribuziun da La Quotidiana. Uschia pudess la gasetta, che ha actualmain circa 4000 abunentas ed abunents e ch'è – sco unica gasetta dal di rumantscha – d'ina fitg gronda impurtanza per la diversità linguistica en il chantun, vegnir segirada per ils proxims onns.

Las sutsegnadras ed ils sutsegnaders tschentan en quest connex las suandantas dumondas a la regenza:

1. È la regenza er da l'avis che l'introducziun d'ina gasetta dal di rumantscha avant 20 onns è stada ina gronda prestaziun e che la sistida da quella avess consequenzas fatalas per l'avegnir da la lingua rumantscha, oravant tut er ord vista da la promoziun linguistica?
2. È la regenza pronta da collavurar vi d'ina soluziun e da porscher maun per finanziair ina tala, per che la Lia Rumantscha u la ANR possa metter a disposiziun ils meds finanzials pretendids per salvar sin questa via La Quotidiana per il futur?
3. Tge pussaivladads finanzialas vesa la regenza per metter a disposiziun – ensemen cun la confederaziun – a curta vista meds finanzials supplementars per ils onns 2018-2020?

Cuira, ils 13 da zercladur 2017

Casanova (Glion), Atanes, Thomann-Frank, Alig, Baselgia-Brunner, Berther (Mustér), Blumenthal, Bondolfi, Brandenburger, Bucher-Brini, Buchli-Mannhart, Caduff, Cahenzli-Philipp, Caluori, Casutt-Derungs, Cavegn, Danuser, Darms-Landolt, Della Vedova, Deplazes, Dermont, Dosch, Epp, Fasani, Florin-Caluori, Foffa, Gartmann-Albin, Geisseler Hans, Giacomelli, Hardegger, Jaag, Joos, Kunfermann, Lamprecht, Locher Benguerel, Märchy-Caduff, Michael (Donat), Monigatti, Niederer, Noi-Togni, Papa, Pedrini, Perl, Peyer, Pult, Salis, Sax, Schneider, Tenchio, Thöny, Tomaschett (Breil), Tomaschett-Berther (Trun), Zanetti, Berther (Segnas), Bossi, Gassmann, Geisseler Severin, Wellig